

Komisaun Ekonomia no Dezenvolvimentu

RELATÓRIU

VIZITA FISKALIZASAUN IHA MUNISÍPIU BOBONARO

I. INTRODUSAUN

1.1. Enkuadramentu Legal

Komisaun Ekonomia no Dezenvolvimentu, Parlamentu Nasional hala'ó vizita fiskalizasaun bazeia ba art.^o 92^o, art.^o 95^o, n.^o 3 alínea e), kombinadu ho art.^o 145^o n.^o 3) hosi Konstituisaun RDTL, no mos bazeia ba art.^o 35^o alínea c), kombinadu ho art.^o 79^o alínea f) hosi Rejimentu Parlamentu Nasional.

Vizita ne'e bazeia ba planu atividade ba tinan 2020 ne'ebe koalia konaba vizita lokal no mos bazeia ba pedidu hosi instituisaun relevante sira, nune'e liu hosi deliberaun ne'ebe komisaun foti iha loron 16 novembru 2020 no iha loron ne'e kedas komisaun hato'ó pedidu autorizasaun ba Presidente Parlamentu Nasional, no tuir mai hetan despachu hosi Presidente Parlamentu Nasional iha loron 19 novembru 2020.

Haktuir ba despachu refere, mak iha loron 16-18 dezembru 2020 komisaun realiza visita fiskalizasaun ba iha munisípiu Bobonaro ho intensaun atu haré no rona diretamente rezultadu hosi implementasaun atividade sira iha munisípiu refere.

1.2. Área Fiskalizasaun

Delegasaun halo fiskalizasaun ba área ne'ebe mak kabe ba kompetensia Komisaun Ekonomia no Dezenvolvimentu nian hanesan: MAP, SEFOPE, MTCL, Ambiente, Kooperativas, maibe komisaun ba haré liu área sira ne'ebe identifika ona hanesan: Vizita Sucursal BNCTL Maliana, Vizita Edifísiu SEFOPE no Vizita Edifísiu Estatística.

1.3. Métopu Fiskalizasaun

Métodu ne'ebe komisaun uza iha fiskalizasaun ne'e mak liu hosi reuniaun no observaun. Depois observaun komisaun reuni hodi halo avaliaun ba dados ne'ebe iha molok aprova. Ita bele komprende métodu hirak ne'e hanesan tuir mai ne'e:

Komisaun Ekonomia no Dezenvolvimentu

1. Enkontru

Delegasaun hasoru malu ho representante instituisaun no diresaun linha ministériu sira hanesan MTCI, SEFOPE, Kooperativas, Ambiente no Sucursal BNCTL.

2. Observasaun direta

Haré obra fiziku, koalia ho responsavel sira no rona sira nia lamentasoens.

3. Análiza

Cross check dados ne'ebe hetan hosi vizita, liga ba ezekusaun orsamentu no dados ne'ebe mai hosi governu, hodi hatene konaba efisiensia no efikasias ezekusaun orsamentu, atu hatene konaba balansu entre despezas no benefisiariu sira, no atu sukat meta polítika konaba retornu ekonómiku.

1.4. Objetivu Vizita

Objetivu husi vizita fiskalizasaun ne'e:

1. Atu haré efisiensia no efikasias iha ezekusaun orsamentu jeral estadu bazeia ba kumprimentu lei no kualidade obra;
2. Rejista no identifika problema ne'ebe iha, relasiona ho ezekusaun orsamentu (balansu ba benefisiariu sira no osan ne'ebe gasta).

1.5. Delegasaun

Delegasaun komisaun D ne'ebe hola parte iha vizita fiskalizasaun ne'e kompostu hosi deputadus, teknikus, jornalista no motoristas hanesan tuir mai:

- | | |
|---------------------------------------|---------------------|
| 1. Deputadu Antoninho Bianco | Presidente Komisaun |
| 2. Deputada Olinda Guterres | Vice-presidente |
| 3. Deputadu Alexandrino C. da Cruz | Sekretáriu |
| 4. Deputadu António dos Santos "55" | Membru |
| 5. Deputadu Ricardo Baptista | Membru |
| 6. Deputadu José Virgílio R. Ferreira | Membru |
| 7. Deputadu Mariano Assanami Sabino | Membru |

Komisaun Ekonomia no Dezenvolvimentu

8. Téknikus, Jornalista no Motoristas

II. REZULTADU VIZITA NO ENKONTRU

2.1. Vizita no Enkontru iha Edefísiu Sucursal BNCTL Maliana

Iha vizita ne'e, delegasaun Komisaun D ne'ebe simu direta hosi Kordenador Sucursal BNCTL Maliana, Senhor Silberto dos Santos ho ekipa ne'ebe liu hosi serimonia tara tais ba membru Komisaun D. Hafoin kontinua lori delegasaun ba salaun enkontru. Iha enkontru ne'e, ba dala uluk loka hosi Kordenador Sucursal BNCTL Maliana hodi hato'o liafuan bem vindo ba Presidente Komisaun D ho komitiva. Iha intrudusaun haktuir katak ami nia parte sente orgulho, tamba loron ohin hetan vizita especial hosi membru Parlamentu Nasional, liu hosi Komisaun Ekonomia no Dezenvolvimentu. Nia parte salienta liu tan katak parese Sucursal hotu iha Timor Leste Maliana mak úniku hetan vizita dahuluk, tan ne'e agrade se wain no hein katak ho vizita ida ne'e bele rai hela informasaun diak ruma, nune'e mos bele haré no rona direktamente kondisaun no situasaun ne'ebe infrenta hodi nune'e bele kanaliza ba iha instituisaun ne'ebe kompetente hodi bele resolve, liu-liu oinsa mak bele kapitaliza liu tan BNCTL iha futuru.

BNCTL ho nia vizaun no misaun mak atu dezenvolve a'an sai hanesan banku komersial ida iha Timor-Leste ne'ebe fornese servisu financeira bankaria ba kliente tomak iha área rurais no mos área urbana ho objetivu ida mak atu hamenus kiak no mukit hodi promove dezenvolvimentu no atividade ekonomia iha Timor Leste.

Tuir mai Kordenador fo sai konaba total forsa trabalhu (funsionáriu) ne'ebe servisu iha Sucursal BNCTL Maliana hamutuk ema nain 16, kompostu hosi mane nain 11 no feto nain 5.

Atividade operacional ne'ebe Sucursal BNCTL Maliana hala'o mak hanesan fo kréditu, simu depósitu, halo transferencias, fasilita ATM no fasilita banku movel.

Konaba atividade kréditu ne'ebe iha refere ba programa ou (produ) hamutuk sanulu hanesan: Kréditu ba agrikultor sira ho atividade hanesan halo natar, kuda modo, peskas, kafe; Kréditu ba

Komisaun Ekonomia no Dezenvolvimentu

negociante sira hanesan atividade loke kios; Kréditu ba projetus ne'ebe hetan tenderizasaun hosi governu; Kréditu ba investimentu ki'ik ne'ebe fokus liu ba iha agrikultura no peskas hanesan fo kréditu hand trator ba natar nain sira hodi halo natar, kréditu máquina baku hare no máquina dulas hare, no mos fo kréditu motor zonson ba peskador sira ne'ebe liu hosi grupu ho 6% kada tinan; Kréditu ba grupu no mos individu sira hanesan inan feto sira ne'ebe halo negósiu iha merkadu; Kréditu ba funsionariu públiku sira; Kréditu ba funsionariu interna BNCTL; Kréditu ba veteranos, martires no asuain sira; Kréditu bokae ne'ebe fo oportunidade ba ONG, lojas no mos empresa ki'ik sira ne'ebe precisa.

Konaba atividade depósito hanesan depósito mai hosi grupu sira, individu, hosi governu no mos hosi companhia sira. Iha mos depósito ho prazu ne'ebe aplika ba ema sira ne'ebe depósito ho montante bo'ot. Kria mos konta ida ne'ebe especial ba agrikultor sira no la precisa kada fulan sira estor funan, maibe iha momentu kréditu sai total funan hira tau ona iha konta ne'e no wainhira sira la biban estor tuir tempu ne'ebe determinadu banku bele koa direta hosi konta refere. Fasilita mos konta ba idoso, invalidos no bolsa da mãe. Fornese mos konta ba depósito asuain. Fasilita mos programa ha'u nia futuru ne'ebe fornese ba comunidade, liu-liu ba labarik sira ho idade 0 ano to'o 17 anos hodi loke konta ba sira nia futuru.

Konaba transferência osan simu no sai ne'e maioria mai hosi estudante sira ne'ebe mak halo hela estudu iha Dili.

Liga ba banku movel iha facilidade transporte kareta ida ne'ebe hala'o mos atividade hanesan fasilita pagamentu ba idoso, invalidos, bolsa da mãe ne'ebe kobre ba to'o suku sira. Nune'e, ho meios banku movel ne'e fasilita mos formasaun ba comunidade sira konaba saida mak kréditu, depósito, transferência no seluk tan.

Konaba máquina ATM monta ona iha fatin rua hanesan iha administrasaun munisípiu no iha edifísiu Sucursal BNCTL Maliana, no tuir planu sei monta tan rua iha Batugade no Atabae. Nune'e mos monta ona máquina pos BNCTL iha loja sira.

Komisaun Ekonomia no Dezenvolvimentu

Kestaun liga ba dados kréditu no depósito grafikamente hatudu katak kada tinan sae, hanesan total kréditu iha USD 7 milhões no depósito iha USD 6 milhões. Depósito jeral ne'e kona funan 0.50% kada tinan no depósito prazu ne'ebe bazeia ba kontratu maximal tinan tolu kada tinan kona funan 0.25%. Maibe dados kompletu iha BNCTL nasional.

Pagamentu ba idoso no bolsa da mãe ne'ebe lori tempu naruk dala ruma bele to'o fulan tolu foin mak hotu, tamba iha deit transporte ida mak kobre ba to'o suku no aldeia sira iha munisípiu Bobonaro. Ba idoso ne'ebe moras todan, tamba iha ona akordo ho Ministériu Solidaridade Social no Inkluzoan (MSSI) ne'ebe representa bele simu, maibe akompanhia ho karta rekomendasaun hosi xefe suku no hetan visto hosi administrador posto administrativo, maibe balun ne'ebe distancia hela fatin besik no kondisaun estrada diak BNCTL direta ba halo pagamentu ba nain rasik.

Kréditu ne'ebe liga ba investimentu, laos ba deit investimentu ki'ik, maibe bele ba mos investimentu bo'ot. Ba investimentu bo'ot, wainhira simu proposta banku sei verifika hodi halo analiza mak foin bele hatene katak preenche duni rekizitus ne'ebe banku iha, hafoin mak bele diside aprova ou lae.

Konaba kréditu transporte hanesan autocarro (bis) ne'ebe BNCTL prepara ona kondisaun no iha tinan oin bele lansa ona ba públiku.

Kréditu mal parado (kredit macet) ne'e iha fulan novembru 2020 mak sae ba 1.1%, tamba difikuldade hasoru hela pademia covid-19, maibe iha situasaun normal tun ba 0.28%.

Komisaun Ekonomia no Dezenvolvimentu



Vizita no Enkontru iha Edefísiu Secursal BNCT

2.3. Vizita no Enkontru iha Edifísiu SEFOPE Maliana

Iha vizita ne'e, delegasaun realiza uluk sorumutu ho diretor no xefe departemntu linha ministériu sira hanesan SEFOPE, MTCI, Kooperativas, Ambiente no Estatística iha salaun sorumutu diresaun SEFOPE munisípiu Bobonaro. Iha sorumutu ne'e antes ható'o konaba objetivu vizita fiskalizasaun, ba dala uluk Presidente Komisaun, Deputadu Antoninho Bianco intrudus konaba delegasaun Komisaun D.

Presidente haktuir liu tan katak objetivu principal hosi vizita de trabalhu ida ne'e bazeia ba pedidu hosi Sekretáriu Estadu ne'ebe husu Komisaun D nia disponibilidade hodi vizita edefísiu SEFOPE munisípiu Bobonaro ne'ebe kondisaun grave liu, alende ida ne'e atu hetan mos informasaun hosi senhor diretor no xefe departementu sira liga ho atividade sira ne'ebe hala'ona, atividade sira ne'ebe hala'oda duk hela no mos atividade sira ne'ebe planu ona atu hala'oba tempu oin. Nia objetivu ne'e atu hetan dadus hodi fo apoiu diak liu tan ba kontinuasaun programa ministériu no sekretáriu estadu sira.

Ho nune'e, tuir mai tempu tomak ba representantes linha ministériu sira hodi atualiza informasaun.

Komisaun Ekonomia no Dezenvolvimentu

Ne'ebe hahu hosi diresaun SEFOPE, iha biban ne'e diretor SEFOPE la marka prezensa, tamba partisipa hela enkontru iha Díli, nune'e senhor Leandro mak representa diretor SEFOPE hodi relata informasaun. Molok relata informasaun, ba dala uluk senhor Leandro hato'o agradece no bem vindo ba Presidente Komisaun ho komitiva ne'ebe mak ohin loron marka prezensa iha munisípiu Bobonaro hodi hala'o atividade fiskalizasaun tuir kna'ar hanesan representante povu iha uma fukun Parlamentu Nasional no especialmente mai direta iha edifísiu SEFOPE hodi realiza sorumutu ho diresaun sira ne'ebe mak marka prezensa iha ne'e.

Tuir mai senhor Leandro fo sai katak edefisiu atual SEFOPE nia kondisaun grave liu ne'ebe mak precisa duni atendentu urjente hodi konstrui foun, tamba se hosik hela hanesan ne'e mak wainhira anin bo'ot ruma sei fo ameasa ba funsionáriu sira sei la servisu ho hakmatek.

Konaba empregu parte SEFOPE Munisípiu Bobonaro la hatene número lolos ne'e hira, tamba depois hetan tiha servisu la fo hatene ba iha SEFOPE hodi atualiza iha base dados, maibe dados konaba ema buka servisu no buka formasaun iha.

Kestaun refere, tamba instituisaun hotu governu nian la valoriza kartaun evidensia ne'ebe SEFOPE produs ba joven desempregu sira hodi utiliza ba buka servisu la sai prioridade, maibe kartaun eleitoral mak sai fali prioridade, wainhira utiliza ba buka servisu, maibe funsaun lolos kartaun eleitoral mak utiliza ba iha tempu eleisaun, tan sujere atu kria regra ruma ba funsionamentu kartaun evidensia ba instituisaun hotu governu nian.

Tuir fali xefe departementu MTCI, senhor José ne'ebe fo sai katak hanesan representante MTCI iha munisípiu ho funsaun mak halo kordenasaun no akompanhamentu ba política ministériu nian ne'ebe implementa iha munisípu, tamba durante ne'e seidauk hetan delegasaun kompeténsia hosi nasional mai iha munisípiu. Konaba funsionáriu ne'ebe iha hamutuk ema nain 16 no nain 5 mak ho estatuto permanente no nain 11 nudar ajente administrativu ho estatuto kontratadu.

Konaba atividade MTCI durante ne'e la lao, tamba lao hela ho duodécimo. Atividade seluk ne'ebe mak hala'o durante ne'e mak konaba jestaun merkadu.

Komisaun Ekonomia no Dezenvolvimentu

Liga ba setor turismu fatin ne'ebe konhesidu iha munisípiu Bobonaro mak be'e manas Marobo ne'eba mak uluk halo ona konstrusaun, maibe agora kondisaun grave liu.

Liga ba setor komérsiu atividade lao hela, maibe halo deit kontrola ba folin sasan no mos ba produktu ne'ebe liu ona prazu.

Setor indústria, tuir dados hatudu katak iha duni atividatde indústria ne'ebe hetan apoiu orsamentu liu hosi subensaun públika iha tinan 2016, maibe atu ba kontrola no monitoriza mak sai difikuldade, tamba la iha orsamentu operacional.

MTCI rasik la iha edefísio próprio no edefísio ne'ebe utiliza durante ne'e oferese hosi munisípiu, tamba tuir planu munisípiu sei konstrui edifísio Assembleia Munisípal iha fatin refere, maibe relata ona ba nasional no ladauk iha resposta.

Kestaun seluk mak funsionáriu limitadu no oinsa mak atu bele tau matan ba área importante tolu hanesan turismu, komersiu no indústria.

Tuir mai, diresaun Estatestika munisípiu Bobonaro ne'ebe relata konaba servisu ne'ebe durante ne'e hala'o mak halo koleta dados ba konsumidor sira kada semana hodi nune'e to'o fulan hodi haruka ba nasional. Dados ne'ebe kolheta ne'e ba iha merkadu no lojas ba produktu hamutuk 44 hanesan mostarda, fos rai no seluk tan, maibe produktu maioria ne'e mai hosi importasaun.

Tuir fali diresaun Ambiente ne'ebe representa hosi fokal poin senhor José Assis fo sai katak diresaun ambiente iha munisípiu Bobonaro desde destaka to'o agora la iha kompetensia atu hola desijaun ruma, tamba seidauk iha delegasaun kompetensia, maibe servisu ne'ebe hala'o mak halo monitorizasaun ba atividade ekonomika sira hanesan oficina, restaurante, no mos halo kordenasaun servisu ho linha ministériu sira liga ba programa ne'ebe mai hosi nasional.

Atividade ne'ebe hala'o iha fulan outubru 2020 mak liga ba programa cesta básica ne'ebe tuir orientasaun sekretáriu estadu nian husu halo kordenasaun ho autoridade lokal sira hodi produs bote, liu-liu iha postu administrativu Atabae, Balibo no Cailaco.

Komisaun Ekonomia no Dezenvolvimentu

Representante ne'e informa mos kestaun balun ne'ebe sai nudar desafiu ba iha servisu lor-loron mak hanesan:

- Edefisiu kondisaun grave liu;
- Menus funsionariu, iha deit nain 3 kompostu husi permanente nain 2 no kontratadu nain 1 no oinsa mak bele responde ba to'o iha área rural sira;
- Fasilidade hanesan motorizada iha 2, maibe kondisaun at hotu no durante ne'e uza deit motorizada privadu hodi hala'o servisu;
- Orsamentu ba manutensaun limitadu no sentralizadu iha nasional.

Ikus liu, representante hosi diresaun Kooperativas ne'ebe fo sai katak total funsionáriu iha ema nain 4, kompostu hosi permanente nain 2 no kontratadu nain 2.

Atividade ne'ebe hala'o mak hanesan halo kordenasaun no monitorizasaun ba iha grupu kooperativa no pra-kooperativa sira. Tuir dados kooperativa ne'ebe existe iha hát hanesan Kooperativa Lanamona iha Maliana, Kooperativa Nilda iha Lolotoe, Kooperativa Kréditu HA'UN iha Atabae no Kooperativa Kréditu Be'e Manas Marobo iha Maliana. Konaba Pra-Kooperativa iha tolu hanesan Pra-Kooperativa Kréditu Fitun Naroman Bobonaro, Pra-Kooperativa Kréditu Masin Atabae no Pra-Kooperativa Coopeta Maliana.

Hosi kooperativa no pra-kooperativa hirak refere, iha pra-kooperativa Kréditu Masin Atabae la ativu ona, tamba la iha jestaun ne'ebe diak.

Kestaun seluk mak diresaun Kooperativas la iha edefisiu próprio no durante ne'e hamutuk deit iha edefisiu MTCI nian.

Komisaun Ekonomia no Dezenvolvimentu



Enkontru ho representante linha ministériu sira iha salaun SEFOPE munisípiu Bobonaro

2.2. Vizita Terrenu

Iha atividade ikus, delegasaun ba vizita terrenu. Iha vizita terrenu ne'e, ba dahuluk delegasaun ba vizita edefisiu SEFOPE ne'ebe lokaliza iha suku Holsa no haré katak los duni kondisaun fizika edefisiu ne'e grave, tamba parte moru nakfera hosi liur tama to'ó laran, nune'e mos parte leten zinco no plafon kuak no dodok hotu, nune'e iha tempu udan funsónariu sira la halo servisu ho diak.

Komisaun Ekonomia no Dezenvolvimentu



Kondisaun edefísiu SEFOPE munisípiu Bobonaro grave liu

Hafoin delegasaun kontinua fali ba vizita edefísiu Estátistika munisípiu Bobonaro ne´ebe lokaliza iha suku Lahomea. Iha vizita ne´e, delegasaun konsege hasoru malu ho funsionariu balun hodi konversa ba malu no mos halo observasaun direta ba edefísiu no haré katak edefísiu refere kondisaun jeral diak hela.



Vizita edefísiu Estatestika munisípiu Bobonaro

Komisaun Ekonomia no Dezenvolvimentu

III. KONKLUSAUN NO REKOMENDASAUN

3.1. Konkluzau

- Transporte ba Sucursal BNCTL Maliana limitadu hanesan kareta, realidade iha deit kareta ida ne'ebe mak durante ne'e fasilita hodi ba halo pagamentu idoso, invalidos no bolsa da mãe ba to'o iha suku no aldeia sira iha munisípiu Bobonaro;
- Sucursal BNCTL Maliana ho transporte ne'ebe limitadu nune'e pagamentu ba idoso, invalidos no bolsa da mãe kuaze lori to'o fulan tolu foin mak hotu;
- Edifisú SEFOPE no edefisú Ambiente kondisaun fisicamente grave liu;
- Diresaun MTCI ho diresaun Kooperativas la iha edefisú próprio no durante utiliza hela uma ida ne'ebe oferese hosi munisípiu, maibe tuir planu fatin ida ne'e atu konstrui edefisú Assembleia Munisípal;
- Diresaun hirak refere hasoru difikuldade mak hanesan funsionáriu limitadu, la iha orsamentu operacional no transporte limitadu.

3.2. Rekomendasaun

- Rekomenda ba Banco Nacional Comércio Timor Leste atu tau iha konsiderasaun, hodi atribui tan kareta ruma hodi nune'e bele facilita liu tan atividade banku móvel, liu-liu pagamentu ba iha idoso, invalidos no bolsa da mãe ho lais;
- Rekomenda ba Sekretáriu Estadu Formasaun Profissional no Emprego, Sekretáriu Estadu Ambiente, Ministériu Turismu, Comércio no Indústria no Sekretáriu Estadu Kooperativas atu tau iha konsiderasaun hodi konstrui edefisú foun ba diresaun SEFOPE no diresaun Ambiente munisípiu Bobonaro ne'ebe kondisaun grave liu, nune'e mos edefisú ba diresaun MTCI no diresaun Kooperativas ne'ebe mak ladauk iha. Tamba durante ne'e utiliza hela uma ne'ebe fornese hosi munisípiu, maibe tuir planu uma/fatin ne'e sei konstrui edefisú Assembleia Munisípal, alende ne'e mos tau iha konsideraun ho aumenta funsionáriu, orsamentu operacional no transporte hodi nune'e bele facilita servisu ho eficiente no efectivo liu tan.

Komisaun Ekonomia no Dezenvolvimentu

IV. APROVASAUN

Relatóriu ne'e, hetan ona aprovasaun liu husi reuniaun ordinariu komisaun nian ne'ebé realiza iha loron quarta-feira, 13 janeiru 2021, tuku 10h58 Oras Timor Lorosa'e, iha sala Komisaun D Parlamentu Nasional. Prosesu aprovasaun hetan partisipasaun hosi membrus komisaun nain 7 ho rezultadu aprovasaun a Favor 7 Kontra 0 no Abstensaun 0.

V. LIAN IKUS

Ida ne'e mak relatóriu vizita Fiskalizaun Komisaun Ekonomia no Dezenvolvimentu iha Munisípiu Bobonaro no husu autoridade competente atu konsidera relatóriu ne'e.
Obrigadu.

Presidente Komisaun,

Relator,

Deputadu Antoninho Bianco

Deputadu Alexandrino C. da Cruz